

Govor predsjedatelja Zastupničkog doma Parlamentarne skupštine BiH Milorada Živkovića na Sedmoj konferenciji predsjednika parlamenata zemalja članica SEECP-a (Procesa suradnje u Jugoistočnoj Europi)

Sofija, 14. travanj 2008.

" Gospodine predsjedavajući,

Poštovane kolege najviši predstavnici parlamenata država SEECP-a

Vaše ekscelencije,

Dame i gospodo,

Dozvolite mi, najprije, da se zahvalim Vama, poštovani gospodine predsjedniče Pirinski, na srdačnoj i prijateljskoj dobrodošlici u Vašoj prelijepoj zemlji.

Veliko mi je zadovoljstvo biti danas sa vama u Sofiji na konferenciji za koju smatram da je od suštinske važnosti za region, regionalnu saradnju i rekao bih - regionalnu budućnost.

Donoseći vam srdačne pozdrave mojih kolega poslanika Predstavničkog doma Parlamentarne skupštine BiH, kojim trenutno predsjedavam, ujedno vam prenosim njihove želje da susret naš parlamentaraca ovog dijela Evrope da značajan doprinos u tom smislu.

Treba naglasiti da su parlamentarci jugoistočne Evrope duboko svjesni važnosti regionalne saradnje i da će prisutni na ovom skupu uputiti još jedan snažan apel predstavnicima naših država da se proces saradnje na svim nivoima ohrabruje i podstiče.

Smatram da u toj kooperaciji leži ključ našeg zajedničkog ali i pojedinačnog uspjeha. Nadam se i vjerujem da će i dalje jačati ubjeđenje o potrebi pozitivne afirmacije sveukupnih veza među državama koje predstavljamo, i da drugog puta nema jer samo ovaj, koji vodi spoznaji bogatstva različitosti na jednom geografskom području obećava snaženje dobrosusjedskih odnosa, povjerenje i stabilnost u našem regionu.

Zato smo danas tu, da potvrdimo naše čvrsto opredjeljenje za nastavak saradnje i radujem se svečanom potpisivanju Zajedničke završne Deklaracije kao aktu kojim ćemo potvrditi postojeću snagu regiona i zajedničku opredjeljenost država SEECP-a za jačanje saradnje sa Evropskom unijom i drugim organizacijama i inicijativama za raznovrsne oblike međusobne saradnje.

Iskoristio bih ovu priliku da vas pozovem da ujedno podržite i nastojanja Bosne i Hercegovine za ubrzanim procesom ka evropskim i evroatlantskim integracijama. Zašto ne reći - da još snažnijom saradnjom sa nama uvjerite demokratsku Evropu da je Bosna i Hercegovina na dobrom putu, i da, ako vi imate povjerenja u nas, to treba da imaju i naši evropski partneri i da nam dozvole da se pokažemo u punom kapacitetu i punoj odgovornosti!

Iskreno se nadamo da će, kako sada stvari stoje, 28. aprila u Luksemburgu ministri inostranih poslova EU dogovoriti potpisivanje Sporazuma o stabilizaciji i pridruživanju BiH sa EU kao dokaz dosadašnje bosanskohercegovačke pro-evropske politike na kojoj smo intenzivno radili u Parlamentu zajedno sa drugim državnim tijelima i organima na svim nivoima. Sporazum BiH o stabilizaciji i pridruživanju bio bi najbolji dokaz da u našoj zemlji pobjeđuju snage demokratije i vladavine prava, a ne one snage prošlosti koje bi ponovo da žrtvuju naš put ka Evropi radi ličnih uskostranačkih interesa.

Poštovane kolege,

Dozvolite mi da ovom prilikom podsjetim da su tokom zadnjih nekoliko mjeseci, usvojeni između ostalih i zakoni koje nam je Evropska komisija postavila kao uslov na našem putu ka evropskim integracijama. Zadnji i najteži uslov, zakone o policijskim strukturama u Bosni i Hercegovini usvojili smo prije nekoliko dana i time otklonili i posljednju prepreku ka potpisivanju Sporazuma o stabilizaciji i pridruživanju. Istovremeno, usvojili smo između ostalog, i rezoluciju o spremnosti BiH za NATO integracije pa odluka sa nedavnog samita NATO-a u Bukureštu o «intenziviranju dijaloga sa BiH» predstavlja direktan rezultat ove aktivnosti ali i aktivnosti drugih institucija direktno vezanih za sam proces.

Uvažene predsjednici parlamentarci,

Dame i gospodo,

Naša opredjeljenost za evropske i evroatlantske integracije je neupitna, kao što je, nadam se, neupitna i vaša podrška Bosni i Hercegovini na tom evropskom putu.

Do sada smo tim putem, da se slikovito izrazim, koračali, nekad pravilnim tempom a nekad, nažalost i posrćući, ali od narednog mjeseca, nadam se, to koračanje će biti stabilnije i brže.

Imajući u vidu potrebu ubrzanja tog procesa integracije, poštovane kolege, nedavno sam inicirao održavanje jednodnevne tematske konferencije predsjednika parlamenata regiona jugoistočne Evrope u Sarajevu. Cilj ovog skupa trebalo bi biti upravo intenziviranje dijaloga, uzajamne pomoći i saradnje i razmjene iskustava na temu evroatlantskih integracija, ali ovom prilikom, sa naglaskom na zemlje koje su bile članice bivše Jugoslavije, a koje su sada samostalne države ali sa istim evropskim aspiracijama.

Nadam se da će ideja o ovoj Konferenciji uskoro biti realizovana što bi bilo još jedan dokaz zalaganja i spremnosti i nas predstavnika najviših zakonodavnih tijela u stvaranju pozitivne atmosfere saradnje i, možemo reći ne samo *dobrih*, već *izuzetno dobrih* dobrosusjedskih odnosa.

Drage koleginice i kolege,

Mi parlamentarci jugoistočne Evrope dijelimo zajedničku viziju najvišeg političkog foruma regiona - „Procesa saradnje u jugoistočnoj Evropi“, SEECP-a, a najbolji način za otjelotvorenje te vizije je da pomognemo da se nesebično nastavi razmjena dobrih iskustava u reformskim procesima, zakonodavnim, pravosudnim i drugim institucijama.

U tom svjetlu vidimo i buduće djelovanje Savjeta za Regionalnu saradnju čije je sjedište odnedavno, kao što znate, u glavnom gradu Bosne i Hercegovine, u Sarajevu. RCC bi mogao da bude „sabitni“ centar dobrih i pozitivnih iskustava kako bi se prošlost što brže prevazišla, jer od nje se ne živi, već od nade u bolje sutra svih nas i generacija koje dolaze.

Ja bas pozivam da svojim prijedlozima i nesebičnom podrškom RCC to u budućnosti i postane.

Još jednom g. Predsjedniče želim da Vam se lično zahvalim na srdačnom prijemu, a kao domaćinu čestitam Vam na izvanrednom organizovanju ove sedme Konferencije predsjednika parlamenata država SEECP-a." (kraj)